

Sujet 1999: Blau Aktie, d Swisscom goht an d Börse

PTT dr gäli Ries goht mit dr Zyt und tuet sich schpalte,
nur s Kärngschäft, das wo rendiert, will me bhalte.

Us em "T" wie Telefon wird es "S" wie Swisscom in blauer Schrift,
d Leitig vo dere Firma hofft, dass dä neu Name besser gryfft
S Kader meint, an dr Börse isch die Firma e huffe Gäld wärt,
in dere Zyt mit Internet, Fax, Handy und andere modärne Apparat.
Doch wie wärde d Lüt zum Chauf vo dene Aktie animiert?

Für das Problem z löse, wird e Wärbebüro angaschiert.

So chunts, wenn z Obe bim Färnsehgaffe, das haut di us de Sogge,
näbscht blaue Antenne, Auti, au blai Lüt übere Bildschirm zoggle.

S Blau duet in keinere Form um die winzigschti Nuance variere,
mit dene Swisscom-Aktie chasch bym beschte Wille nüt verliere,
das wei si dr mit dere Kampagnie in de Medie suggeriere,
also, wenn du eus duesch froge, deue mir eus um die Aktie futiere.

Dr Ursprung vo dam Blau, wüsse mir mit em beschte Wille nit,
als e Zueschtand von dene Diräktore, wär si nit grad dr Hit.

D Swisscom isch nüm die einzig Firma uff em Märt,
d Öffnig fühert dr zue, dass es bi de Gebühre au no gärt.

Wenn nit druss chunsch bi dene Tarife, muesch di nit scheniere,
mit DiAx, Tele, Sunrise und Anderne chasch günschtiger telefoniere.

Muesch nach Brüssel zwüsche z Obe am Siebeni und Achte e Fon mache,
darfsch uff kei Fall DiAx oder Tele wähle, sunsch bisch nit ganz bache.

Die nationali Gsellshaft muesch linggs lo liege und darfsch si nit beachte,
denn d Sunrise het wytuss dr beschti und günschtigschti Tarif vor de Achte.

Anders isch es nach de Nüne mit em Handy nach Laax,
do nimmsch am Beschte s Agebot vo dr Tele oder DiAx.

S "P" vo dr PTT wird kurz und ohni Schnörkel zur "die Poscht",
es wird rationalisiert und strukturiert bis abe a Bach, bigoscht.

D Betriebsabläuf wärde durch d Mänägscher neu gschtaltet,
dass dr Pöschtlter d Päckli vor dr Tour sortiert, isch veraltet.

Als Byschpiel findet s Oschterpäckli vom Tante Trudy vo Lupsige dr Wäg
zum Hansli via Lieschtel über Egerchinge uff e Sältisbärg.

Für all die neue Lösige bruchts halt au die nötigi Infrashstruktur,
so baut d Poscht z Basel e Huus in top modärner Architektur.

Noch däm me dr dritti Shtock fertig betoniert hett,
hei die Debbe nümme gwüsst, wofür me das Huus bruche wett.

"T" wie Telegramm isch ganz verlore gange und nümme umme,
hejo machsch e Telegramm anstatt e Fax, denn bisch e Dumme.

Es Telegramm chönne sich hütt die Meischte
by dene Gebühre schlicht nümme leischte.

Anstatt an de Aktie umme z schtudiere, wo mir sowiso nit begryffe,
göng mir jetzt uff d Stross, go drummle und go umme pfyffe.

Am Fasnechts-Zyschtig duesch nit studiere dr Börsebricht,
well denn ghört der Bsuech vo dr Latärne-Usstellig zur Pflicht.